

# *WIITHELA WA*

## *EKURTIINA YA OKATHI*

♪ Kintthuna kihimye va wira mavekelo anyu ahaakhuliwa, mithukumano ntoko saarinaahu okathi opacenryaaka mmutekoni, miyaakha sinci-ene sivinre. Miyo nkinatoko... Hiyo hata khinaawerya waavaha opuro atthu. Ni naanilivaka nipuro na meera ni sothene, yaanikhala oophiyerya iwe ewoora yaneeraru, wira esarye opuro. Saahaana owaliwa mikhora, khiyaahiya ovolowa. Hiyo naaphiya iwe ewoora yaneethanu neili. Munnona? Ikonto sene paahi akhumaka mapuro othene. Paahi...

<sup>2</sup> Ni kaahilavula ohiyu mithanu sookiserya vamuthukumanoni wookiserya, nto kaakhalinhe Masu paahi eriyari, khupacerya osuwela owerya Masu yaarinaaya. Munnona? Okhala wira, Masu ti Muluku. Munnona? "Wopaceryani naari Nsu, Nsu naari ni Muluku, nto Nsu naari Muluku. Vano Nsu nihiipaka erutthu khukhala ni hiyo."

<sup>3</sup> Vano, aHeperi 4 ahimmye wira, wira, "Masu a Muluku t'otepaxa wiitha onvikana xoowa oniitha ninn-ninno." Munnona? "Masu a Muluku t'owiithaxa ovikana, annikela vanlupanyiwa makhuva, ni annithikila, ni annilamula miyuupuwelo sa mmuruni, murima." Munnona? Ti yeeyo, Masu a Muluku.

<sup>4</sup> Vano yakhala yoovaha vakhanlyahu omumulaka-vo; ni Masu, Mmansaya, okhanle Kristu, Yoowo okhanle Masu, onikela mwa hiyo, ni olamula miyuupuwelo sa mmuruni, ntoko sinoonakaanyu. Munnona? Moota enreeraaya. Nto, woona etthu Owo iiraly'awe ni enamuna onireerihalyaw! Vano nto e...

<sup>5</sup> Eyo, kinnoona yeeyo, okhaliha Masu awo eriyari ohiyu mixexe, waahiya atthu okilaathi paahi oomaala, vano nto wiitthaala paahi, ni Erooho Yoowaarya yaamuwiitthana atthu ni wira itthu vamuthukumanoni.

<sup>6</sup> Vano nto, ohiyu wookiserya, Ettiminku yookiserya oxekuwa, kaahoona omosa wa othataana wuulupalex wo ovoniha kitonko aka woona wAmerika. Munnona? Awo yaari... Kimuruma Billy okhuruwa ni ittikitti emiya, ni Gene ni emiya, ni Leo emiya, ni Roy ni emiya, khukawa paahi ittikitti sothene, soophiyaka imiya thanu. Vano nto voonalayaya Masu okuxa mweettiheryo, ni etthu Awo yiiraaya, ni okhalaka mwa Masu yaawo vano, waaruuhaplaplatforma. Nto kaahivoona alopwana n'athiyana waariha attootto aya, ni sikina, n'uvonihiwa ehinatthi hata ophiya vaplatforma, mwaha wo woona paahi. Munnona? Masu

a Muluku yaahikhuma, vaavale, ni wiiponoweliha mmurimani mwaya, mwa Mitthaka iye mithanu, wala Mitthaka mixexe, mpakha awo waamini Yaawo ni murim'aya wothene. Vano, ethu emosa paahi awo yaarinaaya wira, waari okhalana enamuna emosa y'okwannya vakhani, moone, ethu ekina, nto yaakhala ekeekhai. Ni emalakaru ophiya vaplataforma, yaanvonihiwa vaavale vaplat-... vakhani ehinatthi ovikana vaplataforma.

<sup>7</sup> Miyo kinnaamini, axinna va, wira nyuwo othene munnimusuwela Munna Ed, Munna Ed Hooper. Khamummusuwela? Nyuwo a wArkansas, wu? Owo aahikumana...Owo aari ni miyo wopaceryani wa muteko woopacerya. Owo khwira, "Yaakhala ntoko wira okathi wa khalayi," owo khwira, "okathi, ntoko yiirakaaya, miyaakha sivinre."

<sup>8</sup> Ni yaahikhala atthu yaarina miyuuve yaari—yaari *siiso*, yaatthinke, avonihewe. Oohoona, oohiiwa, oohilavula, inamuna sothene sa itthu Apwyi'ahu yiiraly'aya. Hata nkaaphiyenrye waakwannya atthu. Masu yaarookhuma yiiraka yeeyo.

<sup>9</sup> Vano Apwiya aakivaha Mutthaka mmosa kaatthunaaka olavula mukereja, nihiku nlo, katthikaru, kakhalana okathi. Nkireerane muteko. Vano kihaana okhuma-tho, meelo, kimulipelelaka mwali ola orwa. Ni hata kihinatthi opweha murupa aka owaani, aahikhala mutthu vale. Ni nkikilaanthetho, tthiri. Munnona? Hata nkilavunle ni amusi aka koophiyaru. Munnona? Ni ti—vekeekhai wuukhuwa. Ni kihaana oveka mavekelo anyu nyuwo othene, nave, wira Apwiya ekikhaliherye wira kivilele.

<sup>10</sup> Vano...[Nipuro vahiiitthu mufiitani—Mol.] Kinnimoona munn'ihu va, ohireere, owereiwa saana, ommaathale vanrepani va. Ni hiyo...

<sup>11</sup> Ookhala onrwa, vahilekenle, onikuxa, wira nirowe oLouisville. Kintthuna wira muupuwеле ovekela, nave, mwali mmosa ooreera murima, wira, owo khorina miyaakha soophiyaka muloko ni mithanu na miraru. Owo maphapo, ni mwali mmosa muKristu muxikola. Nto aximwali akina yaanimulavula yoowo, moosuwela, aximwali aili, ni waaleela moota yaary'aya, epantte xeeni y'ekumi awo yaahaleelaaya, ni wira yaahaana okhala ntoko aximwali akina. Nto mwali mmosa aahiwerya oxinta eyo. Ola mmosa khukhala oovelavela, ni khukhala oohisoona saana mwaha wa yeeyo, nto khurowa asusaka, ni arowaka ottaiwenexa, ni oxankaka mwaha wa yeeyo. Nto vookiserya khumphwanya wuukhuleya muupuwelo. Ni awo...Owo ori nipuro n'anamukhwanepa. Ame awe n'atithi awe animoorwa, vakhani paahi, vakhiviru ni Crandall, Indiana, wira arowe empa ela weiwo awo anrowaaya weehererya omuroiha, oMadison, meelo.

<sup>12</sup> Vano, mwa—mwali, khiwaavo wuukhuleya wa mw'erutthuni mwa mwali. Owo...Khiyaavo etthu, ya mw'erutthuni. Owo mukumii voolekana. Masi ti yoolipa saana oleeliheriwa. Ni vekeekhai khenweryaneya oleeliheriwa. Etthu ene okhala wira, erooho awe eroosusa. Munnona? Vano, nyuwo—nyuwo muhaana ovava erooho awe ni ohokoloxerya nipuro naya. Munnona? Yookhala...

<sup>13</sup> Ntoko, simanlyahu olavula va, isumana vakhani sivinre, ya moota esisteema ya mutthu envaraaya muteko. Moota sikhanyaya miyoonelo mithanu sinvolowaniwa mw'erutthuni, vano nto iphiro thanu ntoko naarowaahu wiithana. Iphiro thanu, ntoko—ntoko akhili, otthokelela, ni sikina, hiyo ninkelanaahu mmunepani. Vano nto mwakela murohonni, eri ephiro emosa paahi, nto eyo enkhala mwaha wo otthuna mmansinyu, ephitaanne ni moota mutthu opattuxiwaawe.

<sup>14</sup> Munooewera waakhela Yeeyo, ahiiso munooewera ohiya. Munooewera omukupali Kristu ntoko Moopoli, wala omuhiya Owo. Ni nyuwo nlelo muri vakhiviru va Mwiri yoole, ole wa Ekumi ni wa okhwa. Khula mutthu oniheliwa oholo wa Mwiri yoowo, ahiiso Muluku aamukhala oohixariya omuhela mmosa vale, ni nto ohinvaha mukina muraarelo wo—wo othanla yooreera ni yoonanara. Ni khula mmosa a hiyo ohaana muraarelo yoowo.

<sup>15</sup> Nave-tho, mwa yeeyo, erooho, ninoowerya ovonihiwa, ahiiso ohiwerya ovonihiwa. Vano, kahi mwaha wo wira eroohikhala... wira khanivonihiwe voolekana ni Muluku. Hiyo noovonihawa. Okhala wira waataana ti voohitthuneya etthu. Ni Owo oothuma ovonihiwa wahu. Tivo, ovonihiwa wahu ti—ti wawihu. Ti wawihu. Vano, mwaha ene ti ninrowa okuxa ephiro *ela*, wira naamini yeeyo; wala ephiro *ela*, wira nihaamini tu. Vano, eri enamuna emosa paahi nikhanly'ahu orowaka Oholo wa Muluku.

<sup>16</sup> Vano, mwaan'ola, ooreera, ame awe yaari mpattathi. Miyo, wulu...Oh, yaari mmosa w'axipathani aka. Awo yaari mwali ooreera murima, aakhuma ethoko emosa ya eNasareeno saana, mwali oosivela. Ni orina iya oothamaleya. Miyo kinnimusuwela, nave, saana ene, mmiravo omuthenle. Ni owo mwaamukhaami paahi... Awo anaalela aana awo wira yaarumele Apwiya, ni ahaahela oxikola. Ni yaari oolipiheya saana mwa Kristu, wira ahiireke itthu sikhanyaya. Masi yoorowa.

<sup>17</sup> Wuukhuleya paahi, voolekana ntoko siryaaka...kooweha naanaano, koomuweha-tho mwammiravo mmosa, aarina etthu yeeyo, voolekana. Ni va...Hiyo naahirowa iwe ohiyu omosa, owannyawo Munna Wright, ni Orville aari paahi—paahi oowuukhuleya voomalela. Nto owo, moosuwela, okathi eerenyawo okikumiha mpaani; apatthani ooreera murima ntoko Orville ni miyo sikhanyahu, eekeekhai ntoko wira ka atithi

awe. Kihaatheliha atithi awe ni ame awe. Nto owo aamutupha paahi n'unyakula, "Mukhume va! Mukhume va! Mukhume va!" Munnona?

<sup>18</sup> Vano, naarinaahu wira iwe waari okela muliinyani mwa erooho ni ovaro erooho ya mmirav'wo. Munnona? Oxanka wunci-ene waarimoorwa vamurimani vawe mwaamukhaani. Owo mmiravo, ni aahoona yinci-ene. Nto khimuhokoloxerya nipuro vaathuneya owo okhala. Munnona? Mahiku vakhani, owo aari—owo aari saana.

<sup>19</sup> Vano, eyo etthu emosaru erina wiiriwaka mwa mwaha ola. Miyo kihonna, ni koosuwela wira ekeekhaii. Masi vano, paahi... Miyo—miyo kinookekeli nyuwo othene wira nvekele vano, wira—wira Muluku akikhaliherye omphwanya mwaaruusi ola. Nipuro nimosa, vaavo owo ohinsuwelaawe vatthu vary'awe, nto omuhokoloxerya nipuro nawe. Ephiro eyo enoorwa mwaha wo waamini. Moone, owo khokhanle okhalanaka waamini wa yoowo mwaneene. Owo khonsuwela otthu ory'awe, wala etthu p'itthu. Munnona? Eyo—ontthuneya okuxa waamini wahu va.

<sup>20</sup> Nto vano, mwa yeeyo, owerya iwe wa ohihimuwa wa Kristu, Owo onnivahaawe oreeriwa. Ti vaavo, nyuwo, mwa enamuna emosa, Masu a Muluku ankelaaya mwa natampi. Ni Awo ahaana orowa ovikana olaleya wa Masu alavuliwaka. Mwaha wa yeeyo kaatthunaaka olavula vakhani voosiis'ula kihinatthi waavekelela aretta. [Nipuro vahitthu mufiitani—Mol.]

<sup>21</sup> Munnuupuwela yoowoona, woohikhala khalayi, Apwiya yaakivahale aya, moosuwela, yo woona Epantte ekina? Munnuupuwela voosiis'ule okathi waalavulaaka onamoona mwaha wo woona Epantte ekina? Ahe, eyo ekeekhaii.

<sup>22</sup> Ni *Nsu* na Alipa a Nakoso a Ehapari yooreera Yoomalela naahimukumiherya artiiku owo, khuhela elatarato wiithela wa nikukhu va. Ni nookhalana yoolepa ekhaani vathi, epantte ekhaani ya vathi va, enihimya ya muteko. Yeyo, ela epaphelo ya ihapari ya mulaponi mothene entthittiwa mwa mattaava manciene oovirikana. Vano awo yaahivahereriwa nikukhu n'ooholo, ni yoopacerya, mwa yoowoona yeeyo. Munnona?

<sup>23</sup> Ni kookhalana seiyo vasulu va, nto kaathuna wira mukuxe emosa, ni nwerye osoma. Ni owela... Miyo nkaasuwela akavi yaarowa okhala va, axinna, voosiis'ula. Ni nyuwo, nto, nyuwo vairaneyo ohiphwanya emosa, ahe, murowe paahi oskritooriyu. Awo aakhalana weiwo oskritooriyu. Nto awo aanivaha nikuttha na seiyo, sa: "Mutthikele mwiilipihaka." Munnona? Ni ti yeeyo tu eri mmurimani mwaka. Sothene kinweryaaka wiiwa, ti, "Mutthikele mwiilipihaka." Navikanakaru mu—muro wookhala mu—Muttetthe wooreera. Nto nrowe nithikele niilipihaka mpakha nisuwele Muttetthe yoowo.

<sup>24</sup> Vano, kinoona wira awo aakhalana va ovahereriwa wa mwaana a Munna Stricker ni Munna muthiyana Stricker. Tivo eyo...

<sup>25</sup> Onkhalana miyaakha mikavi vano, Munna Stricker? [Munna Stricker muthiyana oniira, "Mithanu na mosa."—Mol.] Axinamwane athanu na mosa. Eyo emusi yooreera.

<sup>26</sup> Nto siiso awo...yaari mamisiyonaariyu ahu wa—wAfrika, naanaano, arootthika. Ni an'aya othene axinamwane ooreerasa. Ni kinniwerya woona wira nave-tho ola, ti, amuruuhaka voosiis'ula wira ovahereriwe.

<sup>27</sup> Ori vayi Teddy? Teddy, mwaamutthuna orwa va vapiyaanoni, minuutu mmosa paahi, mwan'aka? Nto—nto nrowe nikhalane nsipo nahu, nsipo naamukhaani, moosuwela, nsipo nle naamukhaani, kookupali, hiyo niniipakaahu, *Mwaaruuhe*. Eyo ekeekhai? "Mwaarowele vapuwani va etampi."

<sup>28</sup> Nto mwaha wa yeeyo, ninrumihaahu yeela, okhala wira hiyo, ni sothene sinwery'ahu, axitiithi, waaruuhua wira evahereriwe. Hiyo ninaavahererya w'Apwiya ni waaruuhua awo aryeene nlelo attuutthu, wira ehihapupe erowaka vapuwani vo va etampi. *Mwaaruuhe*. Nrowe paahi... Munnisuwela, Teddy? Nrowe niipe eversu emosa ya yeeyo vano.

Mwaaruuhe, mwaaruuhe,  
Mwaakumihe vapuwani v'etampi;  
Mwaaruuhe...

Akhala-tho mukina, vano, mmuruuhue paahi.

Mwaaruuhe axikhaani wa Yesu.

Mwaaruuhe, mwaaruuhe,  
Mwaakumihe vapuwani v'etampi;  
Mwaaruuhe, mwaaruuhe,  
Mwaaruuhe awo oothweelela wa Yesu.

<sup>29</sup> Munna Stricker ni Munna Stricker muthiyana, koosuwela wira munnisuwela etthu enihimyaya nsipo nlo, orowa "waaruuhua," etthunelo yooviha eri mmurimani mwanyu, ophavela waaruuhua ale oorimeela wa Yesu. Ttuutthu anyu, aakhwiye-ru ohinatthi ovahereriwa, wala etthu ekina, ohoopowa, khula enamuna, okhala wira Ephome ya Yesu Kristu ehiira yeeyo oKalvario. Masi wo otthapela mukwaha Awe muulupale wa elapo ya vathi, okathi Owo owiixaathenryawe matata Awe axikhaani ni khwira, "Mwaahiye ekirweeleke Miyo," tivo munimuruuhanyu ttuutthu ola voosiis'ula. Ni ohela nrromelo mwa hiyo, wira niwerye olompa mavekelo o waamini, wa mwaamukhaani, wo ovahererya ekumi awe wa Muluku.

<sup>30</sup> Nsina nawe ti pani? [Tiithi awe oniira, "Marilyn Madge Stricker."—Mol.] Marilyn Madge, Marilyn Madge Stricker. Eyinnuwelo awe t'evi? [Mai awe oniira, "Miyeeri muloko ni miraru."] Miyeeri muloko ni miraru. Oyariwe wAfrika,

eyo ekekhai? [“Ayo.”] Ahe, khino, wakhalaru meelo, mwaamukhaani ola akhale misiyonaariyu mmosa iwe, mmapuwani memmo oyariwaawe-wo. Ni mwa—mwaana ooreera. Mwaamutthuna orwa, Munna Neville?

<sup>31</sup> Nto, Marilyn. Oh, wulu! Miyo kweekwe okisivela axikhaani ala. Kahi ooreera mwanamwan’ola? Ehaali anyu? Ehaali anyu? Nrowe nuuramihe muru. Kinthuna wira, mumpweherye matata.

<sup>32</sup> Tith’ihu a Wirimu, hiyo ninnimuruuha wa Nyuwo Marilyn Madge Stricker, mwanamwan’ola oophenteya oyariwe mmapuwani mwa misawu, okathi ekhotto yaaryaya yoolipa. Miyo kinvekela wira Nyuwo mmureerihe mwaan’ola. mBibiliani, yaahiruuhiwa wa Nyuwo axikhaani ene. Nyuwo mwaahiwixaatherya matata khwaareeriha, khwira, “Mwaahiyе anamwane ekirweeleke Miyo, ni muhaakhoottiheryeke; okhala wira Omwene wa Wirimu ti wawayा.”

<sup>33</sup> Ame awe ni atithi awe animuhela mmoononi mwahu, olelo. Hiyo, mwaha wo waamini, ninwela mavalо, iwe, nimmuhela mmoononi Mw’anyu, mwaha wo waamini. Mureerihe ekumi awe. Munvahe ekumi yoolekela, Pwiya. Owo akhale mwaana a Muluku. Wira owo oorumeele ni ekumi awe yothene, khula mutika wa ekhalelo awe, akhale murumeyi a Kristu. Munivahe, Tithi. Mwaareerihe atithi awe ni ame awe, axirokor’awe ni axinuunu awe. Awo yinnuwe, nave, ekhale emusi yooreera wa muteko wa Muluku.

<sup>34</sup> Tithi, hiyo nинновахани Marilyn Madge mwaamukhaani Nyuwo, mwa Nsina na Yesu Kristu, wa ekumi ya muteko. Mmureerihe, n’atithi awe, ni ame awe, n’ale oophentiwa awe. Ni wira awo akhale ekumi yoolekela, ootthapa mmutekonи mw’Anyu. Mwa Nsina na Yesu. Amen.

<sup>35</sup> Muluku ooreeriheni, Munna Stricker. Muluku ooreeriheni. Iparakha wa mwanamwane ooreera.

Kooxukhuru, mmiravo, Teddy.

<sup>36</sup> Kinnaaphenta axinamwane. Nyuwo khimunaaphenta?

<sup>37</sup> Akavi ahinatoko wiiwa yoowooda Apwiya akivahale aya? Nrowe noone matat’anyu ovenxiwa, ale ahinatoko. Munna Neville, mookhalana eliivuru anyu ekhaani vo, khino, khino mwaamwaasomela va, okathi vakhani. Miyo kinnaamini... Vaava va, xontte.

<sup>38</sup> [Munna Neville onsoma ya Fevereero, 1961 *Nsu na Alopwana a Ehapari yooreera Yoomalela*—Mol.]

[Voosiisu umosa kaarimummaathi voolilini vaka. Kaammalaru ovenya waarpaaka, nto kihela matata waakohi kiitthyuuwa ni muru vamusawuni. Vano kipacerya wiikoha moota onrowaaya okhala Epante ekina. Kiphiyerya osuwela wira kaahikhala ovikana

nuusu na ekumi aka kakhalaxaru ntoko atthu aka, ni kaanitthuna-tho waavarela-tho muteko Apwiya kihinatthi ohiya ekumi ela.]

[Kaahiiwa Nsu naahimya wira: “Nyuwo munoopacerya-ru paahi! Mwiilipihe owana ekhotto! Mutthikele mwiilipihaka!” Kimmaathale-ene vaavale kitthokelelaka moolomo, kuupuwela wira kaamwaanyiherya paahi wiwa Nsu. Emaara ekina Nsu khwira: “Mwiilipihe owana ekhotto! Mukeleleke oholo! Mukeleleke oholo!” Nlelo kihaminik, kuupuwela wira alakela kaaroolavula moolomo ene yoomi. Kilumanyiha iyano saka ni maino aka kihela ntata vayanoni vaka kиwelela. Nsu khulavula-tho: “Mutthikele mwiilipihaka! Mwaasuwelen eri wookiseryani w’ephiro!” Kikhala ntoko wiwa muusika ni moolomo a nsipo nimosa na khalayi, noolimaleleya:]

[Wookinkhela owaani ni kooxanka, ni kintthuna kimoone Yesu,]

[Kaatthuna kiiwe isiinu iye sa ntthyawelo sirumaka,]

[Yaammwaleela ephiro aka ni yaamulakaseiha woova wothene;]

[Pwiya, mukihiyi kiwehe epantte ekina ya ekurtiina y’okathi.]

[Vano Nsu khukoha: “Mwaanitthuna woona epantte ekina y’ekuwo?” Miyo khwaakhula: “Yaamukikhalihera vanci-ene!”]

[Etthu yiiraneiye miyo nkinwerya ohimya. Sintoko kaari mw’erutthuni wala ota, wala sintoko waari okuxiwa, miyo nkisuwenle, masi yaari yoovirikana ni khula yoozoona kitonko aka okhalana. Miyo kaaniwerya woona nipuro kaakuxiwaaka-vo ni kaaniwerya wiisoona kimmaathale ottuli wu voolilini vaka. Miyo khwira: “Ela etthu yootikiniha!”]

[Waahikhala mwaattelo muulupale wa atthu ni awo yaarwa ethtimakaka wira ekikhomase, ekhuwelaka: “Oh, munn’ihu oophenteyexa!” Voopacerya yaarwiyye athiyana, voolekana ntoko a miyaakha miloko miili, ni okathi waakipatikhaaya yiira: “Munn’ihu oophenteyexa!” Aximiravo, m’owaaryani waya w’emiravo, ni maitho yaaryaka ntoko itheneeri ohiyu wooriipela, ni maino ootteela ntoko nluku noowaarya, yaanikipatikha, yiiraka, “Munn’ihu oophenteyexa.”]

[Vano miyo kaahiweha wira miyo, nave, khaahikhala-tho mmiravo. Miyo kiiweha weiwe ni kirukunuwa kiweha ottuli erutthu aka yoowuuluvala yimmaathale voolilini ni matata aka waakohi. Miyo khwira: “Nkinsuwela yeela!”]

[Vapacenry'aka ophavela osuwela oratteene nipo  
kaary'aka, kipacerya osuwela wira kхиwaakhanle nsana  
ni hata meelo iwe. Khaavo aakhala ntoko ookhulumuwa.  
Muttithi wa aximwali ooreeraxa kitonko aka woona  
akipatikhaka, kiphwanya wira waari paahi ophenta  
wuulupale waakixinta ni hata ovariya murima wa erutthu  
ntoko mweettelo wa omutthu. Kiweha wira aximwali ala  
othene yaawara maihi aya mpakha muyuununi ni isaaya  
saya mpakha munawoni.]

[Nuumala yeela, Hope, amwaar'aka oopacerya,  
khukipatikha, khwira: "Munn'aka ooreerexa!" Vano  
mwamuthiyana mukina khukipatikha nto Hope  
khurukunuwa khumpatikha mwamuthiyana. Miyo khwira:  
"Nkinsuwela saana yeela. Ela etthu yoovirikana voomalela  
n'uphenta wahu w'omutthu. Nkinthuna otthikela erutthu  
ile yoowuuluvala voolilini."]

[Vano Nsu nimosa khulavula ni miyo: "Ela t'ile nyuwo  
mulalenry'anyu okhala Erooho Yoowaarya! Ola mphento  
woomalela. Khiyaavo ekhanle oovolowaka Nno ehirina  
yoowo!"]

[Voottharana kikuxiwa kikilaathihiwa nipo  
noottukhuwa. Vookirukurerya saari iyaattelo suulupale  
sa alopwana n'athiyana mwa othapuluwa w'emiravo.  
Awo yaamukhuwela, ni ohakalala: "Oh, munn'ihu  
oophenteyexa, hiyo khanireere otteeliwa murima owoonani  
nno!" Miyo khuupuwela: "Miyo nkinloha, okhala wira  
kinniwersya owoona atthu ala ni kinniwersya woona erutthu  
aka yimmaathale voolilini vale."]

[Nsu khulavula ni miyo: "Nyuwo moosuwela wira  
yoolempwa mBibiliani wira maprefeta yaathukumanyiwe  
n'atthu aya." Miyo khwira: "Ayo kinniupuwela eyo  
mwa Soolempwa, masi khakhanle aBranham anci-ene  
siisa." Nsu khwaakhula: "Ala kahijo aBranham. Ala t'ale  
awinyu oorukunxa murima, yaawo muweettihenry'anyu  
w'Apwiya. Athiyana amosa-amosa ala munuupuwelanyu  
okhala aximwali ni ooreera yaahivikana miyaakha  
miloko mithanu na mixexe okathi nweettihenry'anyu  
w'Apwiya. Khivanxankiha awo okhuwelaka, 'Munn'aka  
oophenteyexa!'" Vano muttithi wothene khukhuwela  
vamosa: "Nyuwo mwahaaronwe ni Ehapari yooreera, hiyo  
khinaarowa okhala wenno!"]

[Miyo khuvekela: "Oh, Yesu ori vayi? Kinthuna  
kimoone Yoowo!" Atthu khwaakhula: "Owo ori osuluxa  
vakhani. Nihiku nlo Owo onimoorwa wa nyuwo. Nyuwo  
mwaarummwe ntoko muholeli, nto Muluku arwa  
vale, Owo onimoolamulani ottharihaka mwiixuttiho  
anyu." Miyo khukoha: "Paulo ni Petru ahaana ovira

moolamuliwani wенно nave?" Waakhula waari: "Ayo!" Miyo khwira, "Miyo kilaleiye etthu awo alaleiye-aya. Miyo nkihapunwe Awo epantte emosa wala ekina. Nipuro awo apatinse aya mwa ኃnsina na Yesu, ni miyo kipatinse aka; nipuro awo yiixttihaly'aya Opatiiso wa Erooho Yoowaarya, ni miyo kihiixttiha. Etthu p'itthu awo yiixttihaly'aya, ni miyo, kihiixttiha.]

[“Hiyo noosuwela eyo,” atthu khuhimya “ni noosuwela wira ninoothikela elapo ya vathi ni nyuwo nihiku nlo. Yesu onimoorwa oolamuleni ottharihaka Masu nyuwo munilalenryaanyu. Vano munoonooniherya wa Yoowo, ni othene vamosa ninoothikela elapo ya vathi wira nakhaleke mahiku othene.” Miyo khukoha: “Kihaana otthikela elapo ya vathi, vano?” Awo khwaakhula: “Ayo, masi mutthikele mwilipihaka!”]

[Vapacenry'aka okhuma nipuro nle nooreera, n'otthapa, ottaiwenexa maitho aka yaaweryaya woona, atthu yaamurwa vaaryaaka wira ekipatikhe, ekhuwelaka: “Munn’aka oophenteyaxa!”]

[Naanaanoru miyo kitthikela voolilini. Miyo khwira: “Oh, Muluku, mukikhaliherye! Muhikihiye nnakhala kiisakalelihaka ni etthu ehikhanle ya Masu. Mukitthuniherye okhala oratteene mwa Masu. Nkincala etthu atthu akina aniiraaya, Pwiya, mukitthuniherye kiilipihe mpakha nipuro nle nooreera, ni nootthapa!”]

[Kookupalixa kihinatoko aka kookhalaru wira onrowa otthuneya ophenta wooloka wira mukele nipuro nle. Khinaakkhanle nrima, nnakhala okhulumuwa, nnakhala eretta, nnakhala wuuluvala, nnakhala okhwa. Oreera woomalela ni ohakalala paahi!]

[Khula eniiraanyu, muhiye itthu sothene sikina mpakha mwaakhele ophenta wooloka! Muphiyerye nipuro mukhanlyanyu waaphentaka atthu othene, hata khula nwanani. Hata wira ntteeke ninoottikinyeya, overunya okukutteyaka, wala ikapwitthi sa nwanani woothoonyani nyuwo, itthu iya khasincala: mwaakhele mphento wooloka!]

[Mwiira muhooponwe, mmukupali Yesu Kristu ntoko Moopoli anyu naanaano va! Mwiira muhipatisiwe mmaasini, mpatisiwe naanaano va! Mwiira muhaakhenle Opatiiso ni Erooho Yoowaarya, mwaakhele naanaano va! Mwiilipihe mpakha ophenta iwe wooloka voomalela onrowa wooriohani nipuro nle nooreera ni nootthapa epantte ekina ya ekurtiina y'okathi!]

<sup>39</sup> Kooxukhuru, Munna, mwaha wa yeeyo. Eyo... Miyo kaahuupuwela, khino, amosa-amosa a nyuwo mwaamusoma

ela. Ni mwiira nlelo muhikhalanne eliivuru ekhaani, vano, munooewerya ophwanya.

<sup>40</sup> Vano va, vathi vene va nikukhu, yookhala elepelo ekhaani enihimya muteko vo. Nkisuwenle sintoko mooweha wala nnari, vathi vaya, nuumala osoma yeeyo. Variyari vene, nuulumo nimosa naamukhaani vathi. [Nipuro vahiiitthu mufiitani—Mol.]

<sup>41</sup> Vano, eyo enrowa mwa khula nttaava vathi v'erimu, moone, wira—wira esommwe mulaponi mothene.

<sup>42</sup> Vano, “Exeeni—exeeni...” ahe, nyuwo muniira, “mwaarowa ohimyela-ni yeeyo, Munna Branham, muhinatthi waavekelela arettat?”

<sup>43</sup> Mwaha wa ela: wira niwerye osuwela wira wiilipiha wahu kuhiyio w'ethiru. Munnona? Hiyo nihaana omwaattamelia Muluku niviraka evirelo ele ya mphento ni waamini. Waamini onninirooha evirelo yeeyo. Ophenta t'onnikelisha. (Kileveleliwe.) [Nipuro vahiiitthu mufiitani—Mol.]

<sup>44</sup> Vano, nyuwo munuupuwela wira Muluku aamu... Vano nrowe... Vano, waamini wanyu onniphya nipo vano, nyuwo munuupuwela wira...? Mwaarowa wuupuwela exeeni vano vaakhanle wira wiilipiha wothene e... etapernakulu ila ni makhuru ala a atthu va anihelelakaaya, wa Omwene wa Muluku? Aakhala anci-ene mu anvukulaka sowaavaha an'aya, mwaha wa Omwene wa Muluku. Aakhala anci-ene va ankhala ahithumaka ikuwo, mwaha wa Omwene wa Muluku. Aakhala anci-ene anviraka mmwanankhayani, ni weetta ahirina ixapattho munawoni, wira aphiye otapernakulu va, ti yeeyo, mwaha wa Omwene wa Muluku.

<sup>45</sup> Mwaamuwerya omutthokelela muratti apintariki elatarato yoosuwanyeya, yooreera, mpakha okhaliha yooreeraxa, vano nto khunahonona? Yaamukhala eththu yoohiloka ni muratti owo. Mwaamuwerya omutthokelela namalepa masipo olepa nsipo mpakha okhaliha nooreeraxa, nto nuumala khunakhera mu—muusika awe? Yaamukhala eththu evonyeiye ni mulipa olepa masipo. Munnona? Khiyaavo hat'eththu evonyeiye ni Muluku. Muluku khompaka eththu siisa, wira ahonone paahi ni oriabela. Ti ya Omwene Awe. Ti wa Ovuwa Wawe.

<sup>46</sup> Khula mmosa a hiyo onvara epantte ya elatarato ela ni nsipo nla. Hiyo na ipantte sa Omwene wa Muluku. Ni eyo ti wii, wii ninoowerya wira mpantte ahu, vakhalaru wira ninnisuwela varyaahu mwa opuro, wira niniira mpantte wa nipo nenla, vano nto ninakhala vaavo nipo nenlo. Ni nipo nimosa ninsuwelaahu, ti moophentani, okhala wira ti yeeyo empaka elatarato.

<sup>47</sup> Vano, ti yoolipa moonaka soowoona iya siisa, n'ithu siiso, wira musuwele eththu eri—eththu eri Epannte ekina. Miyo kaanithuna kaasuwenle. Mulopwan'ola onnihela elepelo ela ekhaani vathi vale, wira ahimye wira maprofeta a khalayi, wira

awo yaahikhalana soowoona iya, ni sikina, ni moota, olelo, hata ovikana ethu... Hiyo khaninwerya osuwela saana, masi Apwiya anninitthuniherya wiilipiha wira nikelie mwa yeeyo ni woona exeeni iyo.

<sup>48</sup> Vano, apatthani, miyo nkaarupa. Ni miyo, eriyari ya nyuwo ni miyo, ni ekere'ela va, miyo nkaari mwa yoovoona. Koosuwela moota enkhalaaya yoovoona. Imosa-imosa va, esumana evinre paahi, ikina, saari mpakha imaara miloko miraru, ohiyu umosa, siiraneye aya. Munowerya otthokelela muritti ori mwa nyuwo. Onnookhalihani oowuukhuleya, vekeekhai.

<sup>49</sup> Nkhi nyuwo mwaaronwe vamuthukumanoni siiso, n'uthokorerya paahi, muthukumano wiiraneye saana wala nnari, yaamukhala mwa nyuwo, paahi—othokorerya paahi? Vaakhanle wira mwaahaana omwaakhula khula murumeyi, khula yookoha, sothene. Muthukumano wiiraneye saana wala nnari, othokorerya waarowa okhala mwa nyuwo, paahi. Nkawehani ethu yaarowaaya owiirihani.

<sup>50</sup> Ni aakhala aamosa-amosa a axirikha aka a muteko, mwaha wo otumiha iliivuru paahi, ni sikina, yaari oowuukhuwa saana, awo yaahaana orowa owaani, moone, wummaathi, khiyaarwiye okereja ohiy'ule. Wulu! Oh, ti yoolipaxa. Ntoko mwaara a mwan'aka, mwali oophenteya muKristu, Loyce. Paahi—mwaha w'orowa omuthukumanoni, paahi... Mwa isumana thanu na tthaaru, ahiiso isumana thanu na piili, voohihiyererya siiso, aahaana okhala vooilini nihiku nimosa wala maili, moone, ahikhalanne muteko. Munnona? Billy, okawa ittikitti vakhani paahi sa mavekelo, nto onkhala owooceya.

<sup>51</sup> Masi, moone, muritti wothene onkhala mwa miyo. Miyo kihanaa olipa ni nyuwo wira mukivekelele. Munnona? Ohiya vo, enihimmwa wira—wira minuutu miloko miili sa—s'olaleya, vathi va muupuxeryo, sinoolikana ni iwoora thanu na tthaaru sa muteko woolipa, wa erutthu anyu. Kinlaleya iwoora piili mpakha tthaaru ohiyu umosa; imaara sikina vaara vararu nihiku nimosa. Munnona?

<sup>52</sup> Vano nto ankhi yoovoona emosa? Yoovoona emosa yaahimukhalika Pwi'yahu Yesu ootteettheya. Ti yeeyo. Bibilia ohimmye wira muthiyana mmosa aarookwannya nlaya Nawe, khimutteettheiha. Ahe, vakhala wira yoovoona emosa yaanimuhiya Owo otteettheya, Owo, Mwaana a Muluku; ankhi miyo, natampi oopoliwe ni mahala, saarowa wira exeeni miloko miraru sa seiyo ohiyu umosa? Munnona? Eyo... Neemenle paahi nuupuwela, ti yoonvikana khula mutthu. Erutthu ya mutthu khenwerya ovilela eyo. Miyo kaamukhala empa ya anamukhw'anepa nipuro nlo, kimanelaka muru aka vaxirini. Munnona? O—otteettheya vahinwery'anyu... Otteettheya wa muhina, moone, eyo enimoomalamalihani paahi.

<sup>53</sup> Vano, masi exeeni mwaarowelaanyu wiilipiheryaka nto? Khino kinoohimya ela. Kinnimoona Munna mulopwana ni Munna muthiyana Cox, vale, Rodney ni mwaar'awe, ni munna muthiyana, va, a ottuli iwe, arukunxale murima naanaano. Wookhala Muttetthe, epantte ekina nipuro nlo, vamphiyereryaanyu wuupuwelela mmuruni mwanyu ni owerya woona Yoowo, ti ethu yoovuwaxa. Onniphwanela wiilipiha wothene oniiraahu. Munnona?

<sup>54</sup> Vano, kihinatthi waavekelela aretta, kaamuhimya ela:

<sup>55</sup> Ankhi ttuutthu, ohinatthi oyariwa, nitthokelele yeeyo, ttuutthu okhanle mmirimani mw'ame awe, mwa miyeeri iya mithanu na mixexe, nto mwaan'ovo aawerya wuupuwela? Owo aamwiira, "Moosuwela? Kileeliwe wira kihanle oyariwa. Ahe, kinrowa wira exeeni ota iwo? Miyo nkinsuwela ethu woohikhala nipuro nla kinkhalaaka va. Miyo kinkumiha ikuru saka muhina. Ni kinrowa okhalaka sayi ota iwo? Kinleeliwa wira nookhala nsuwa nnaarya. Kinleeliwa wira atthu iwe anneetta nno ni nno. Ni nkinsuwela ethu woohikhala nipuro nla va. Ti yothene ensuwelaaka, muumu mu mmi—mmirimani mw'ame aka. Va ti nipuro kipakiwaaka-vo. Va ti yothene kinsuwelaaka, eri mmirimani mu. Ni kinleeliwa wira wookhala opuro onihala!"

<sup>56</sup> Ahe, mwaan'ovo aamuhalela okhwa, woova oyariwa. Eyo ekekhaii? Owo aamukhala oovaka, okhala wira aarowa orowaka nipuro nimosa ohinsuwelaawe ethu na nenlo, nikhanle nuulupalex, nuulupalex vaara imilyawu sene, ovikana nle onkhalaawe. Owo khaarowa osuwela yothene eyo enihimya exeeni, aamwiira, "Sayi, kinrowa wira exeeni?" Owo aamuhalela okhwa, woova oyariwa, masi hiyo ninkhala muumu, ahe, hiyo naatonko okhala iwe emaara emosa, hiyo khinaarowa otthikela iwe hata vakhani, khinaarowa otthuna otthikela mmirimani mwa amaama. Munnona? Nnari, khinaarowa otthuna wira yeeyo.

<sup>57</sup> Nto ti siiso siry'aya okathi onkhwaahu, mpatthani. O Muluku! Munnona? Nyuwo muniyariwa Nipuro nimosa. Nyuwo khimunatoko okhala Weiwo. Khamunwerya osuwela Eyo, moota eryaaya yuulupale. "Onrowa—onrowa okhala sayi Iwe? Miyo . . ." Nto ethu emosa paahi enikisuwelicha, wala nyuwo osuwela wira, okwannya iwe vakhani w'Ekumi, ntoko erooho enkelaaya mwa mwaana mmirimani mw'ame awe. Munnona? T'inamuna emosa paahi nikhanlyahu osuwelaka saana ele ekhanle Muttetthe ole muulupale iwe, ohikhanle-wo eretta, nnakhala oxanka, nnakhala okhwa, nnakhala wuuluvala, hat'ethu. Oh, wulu!

<sup>58</sup> Vano, vammalanyu ophiya Iwe, khamunkhalakhala mutthunaka otthikela nipuro ntoko nla, siiso ntoko ttuutthu ahaarowaawe otthuna otthikela mmirimani mw'ame awe. Munnona? Ti yuulupalex Epantte ekina, moone, Iwe. Hiyo

khaninwerya osuwela Eyo, vekeekhai nnari, khaninwerya. Vano, siiso ntoko ttuutthu ole okhanlyawe ottaiwene wa khula muupuwelo, siiso hiyo nri ottaiwene wa khula osuwela wa ele yaarowa okhala ele Iwe, moone, okhala wira hiyo nri mmirimani mw'elapo, oolikana wira niyariwe nihiku nlo, Momweneni musya, Molumwenkuni musya.

<sup>59</sup> Nto ti siiso sinoonaaka mwaha wa soowoona iyo ni itthu siiso, wala wa khula etthu ekikhumelenle nihiku nle waaronwe aka epantte ekina, epantte ya ota paahi, ni khoona exeeni yaari Ile, vano nto khuthikela nno.

<sup>60</sup> Mwaamuwerya otthokelela okhala ttuutthu ni—ni okhalana o—osuwela etthu, moota yaarowaaya okhala yoovuwaxa weetta nno ni nno, woona miri siphuwaka, axipalame yiipaka, nsuwa naaryaka, ni ekumi ela, vano nto okhala ootthukeliwa mmirimani? Vano, khimwaarowa othuna otthika, hata vakhani.

<sup>61</sup> Ahe, nto, hiyo, wawihu—muupuwelo ahu waamuumma nantiirya, mwa epantte, wala ophavela wuupuwela moota oryaaya Iwe. Okathi, Yoolempwa enihimy'aya, "Niitho sihoonaly'aya, naaru sihiwaly'aya, wala sihitonko okela mmirimani mwa mutthu ti ele Muluku aasukenly'awe, ale animphenta Yoowo." Munnona? Tivo noosuwela wira ti woovuwa Epantte ekina. Nihiku nlo, okhwa, ele eniitthanaahu okhwa, onoonivaha Oyariwa vasya, ni ninookela Molumwenkuni mukina, Epantte ekina.

<sup>62</sup> Munna George, khamunrowa okhala oowuuluvala, oorakala, Iwe. Ni Munna mulopwana ni Munna muthiyana Spencer, ni akina ntoko amosa-amosa a hiyo oowuuluvalaxa, ni sikina, ni ninrowa okhala amiravo iwe mahiku othene.

Ela ya khalayi...ekubo ela ya erutthu  
kinoomoroxa, ni kinoovenya  
Ni kinookuxa otthuveliwa ohinimala,  
N'ukhuwela, kiviraka musulu,  
"Kwaherini, kwaherini, ewoora yoosiva ya  
mavekelo!"

<sup>63</sup> Sothene soomala, nto. Ohikhala-tho ohiyu woolekela wa mavekelo, ohikhala-tho. Ovolowa paahi, munnuwelo ole w'emiravo wa ohakalala wo okhala Iwe, kahi mwa mwaakha mmosa paahi, wala miloko mithanu, wala miyaakha emilyawu, masi nakhalaru Iwe miyaakha ipilyawu emiya, ninrowa wira hata nihipacenrye nnakhala. Ti yeeyo. Tivo xeeni naahaakhanlyahu okhalaka ootthapa voosis'ula? Xeeni naahaakhanlyahu ohakalalaka? Xeeni naahaakhanlyahu ottotelaka muraarello wa khula etthu yuulupale Muluku onnivahaawe?

<sup>64</sup> Va ori ovoniha wa Muluku. Mwaha Yesu onyakeleliwaawe; wira apwanyule elatarato, ni wira, "Kherina etthu"? Owo onyakenle erutthu Awe wu, maparari khukhuma, wira,

“Ni makhwatta Awe noovonihowi.” Nihihonone elatarato, voosiis’ula. Nrowe nipatikhe Yeeyo, nikupali Yeeyo.

<sup>65</sup> Vano, munna, ni khula mmosa a nyuwo vano onrowa ovekeleliwa, mmurukurerye altaari. Okathi mutthaka olavuliwaaya, okathi vakhani ovinre, mwa otaphulela ni ilavulelo, wira naamuuixaatherya matata aretta ni naamoona miteko sa ikuru sa Muluku.

<sup>66</sup> Vano, munn’ihu, khamurina yo ovenya, munna, mummaathale vo vanrepani. Hiyo nnimoorweelani.

<sup>67</sup> Masi yaakhanle-ene akina va wira avekeleliwe, yaatthuna weemela waltaari, okathi munna ni miyo ninvekelaahu ni owiixaatherya matata aretta, murwe naanaano va. Ni muupuwеле, mpatikhe elatarato eyo, “Ni makhwatta Awe noovonihowi.”

<sup>68</sup> “Miyo nkinsuwela saana eyo, Pwiya.” Vekekhai, nnari. Nyuwo nlelo muri mmirimani mw’elapo.

<sup>69</sup> Masi Owo aahipaka itthokiheryo iyo. Ni Owo khaarowa okuxa... Xeeni Owo akelaka onyakattiwa? Wira apwanyule elatarato ene, wala okhera nsipo, orihela ota? Nnari, mulopwana. Owo oonyakattiwa, oohaaxiwa, ni oovuva ephome, wira hiyo nivonihowi. Ni mwaha wa yeeyo, hiyo, “Ni makhwatta Awe, ninnivonihowi,” khula mmosa a hiyo. Vano, murwaaka, muthukumanaka waltaari mwaha wa mavekelo.

<sup>70</sup> Vano, yinci-enexa ya elaleeryo ehapari ela yuulupale ya wAmerika nno y’olavilavi, ni olavula mwaha wa, “Muhaana wira *ela*, wira *ele*.”

<sup>71</sup> Yookhala etthu emosa entthunaaka okhala naxariya ni nyuwo, mpatthani aka. Etthu ene, enamuna Muluku onvonihaawe, enlipihereya ni omurumeela Yoowo. Munnona? Enlipihereya ni omurumeela Yoowo. Nihaana okupali ovonihiwa wahu ni mulipiheryo, wa, hiyo omurumeela Yoowo numala ovonihiwa. Vano, Bibilia ohimmye wira, “Mulaphulelaneke soottheka sanyu, mmosa ni mukhw’awe. Nvekelelaneke mmosa ni mukhw’awe, wira nvonihiwa.” Munnona? Enlipihereya, mwa nyuwo omurumeela Muluku. Anci-ene a nyuwo va, khino, muri mwa mukhalelo wo okhwa, ni nyuwo—nyuwo muhaana okhwa yaahiiранeye-ru etthu. Vano kintthuna wira nyuwo, mmirimani mwanyu...

<sup>72</sup> Vano, hiyo pooti woottikitthelani ni makhura, hiyo pooti woovekelelani, pastore ni miyo, ovekela nivekelo na waamini, wira sothene sinwery’ahu, masi khenrowa ophwanyiha etthu mpakha nyuwo mukele moopatthanani ni Kristu. Munnona? Nyuwo muhaana orwa moopatthanani mwemmo, wira, “Miyo, Pwiya...”

<sup>73</sup> Kinnimoona mu—mu—mwali mmosa eettaka iwe naanaano va. Owo aahirwa va, woohikhala khalayi owaani, ni etthu ntoko

muuwe, wala eretta ya Hodgkin. Ni owo Mmetotista, waamini wawe. Kookupali wira eyo ekekhaii, kehiyo, munna? Nto owo aahikhalaana mwaapapari muulupale mpararini. Nto vano owo eemenle vale, oovonihiwa.

<sup>74</sup> Kinnimoona Munna Weaver muthiyana eemenle va, aari mmosa wa myaha sootepa sa kankuru kitonko aka woona, kookhalaru. Nto ethu yoopacerya kaamukohaly'aka yaari, vakhala wira aampatisiwa mwa Nsina na Yesu Kristu ni wira aamulapa itampi sawe. Okathi omuroihaly'aka mmaasini mu, kaahaana onvarelela; owo khareere wootta, miyoono sawe, sooyeva saana. Nto owo khupatasiwa mwa Nsina na Yesu Kristu. Nto eyo yaari miyaakha muloko mano sivinre, kahi siiso, murokor'aka? [Munna Weaver muthiyana oniira, "Nnari. Soovira miyaakha muloko ni mithanu na mosa."—Mol.] Miyaakha muloko ni mithanu na mosa. Miyaakha muloko ni mithanu na mosa sa ekumi yoowiinaneliwa, okhala wira aahilikanana wiiwelela. Okathi mameetiku oosuwelaxa nno....

<sup>75</sup> Vano, meetiku awe yoowo khukihimeerya. Okathi, kimuleenle aka—kimuleenle aka, wira, "Oovonihiwa."

<sup>76</sup> Khwira, "Oh, oh! Owo onimookhwa ni kankuru, muhina mwa isumana vakhani. Muhibelavele mwaha wa yeeyo. Owo onimwiira okhwiiye. Isumana vakhani sikina, onimwiira okhwiiye." Ni owo iira onvahale nihiku nimosa wira akhale mukumi. Nto ola ori va, olelo, nuuvira miyaakha muloko ni mithanu na mosa, eemenle waltaari. Exeeni-tho kaakhanly'aka ohimyaka, ethhikelaka emaara ti emaara, emaara ti emaara!

<sup>77</sup> Vano, Muluku khonimwiirela eyo mwan'Awe mmosa paahi, nave khuhinawiirela akina. Owo onniwiirela an'Awe othene. "Ole ontthuna arweeke." Ti... Nyuwo moolattuliwa orwa wa Yoowo. Vano, "Mavekelo o waamini anoomoopola muretta." Bibilia ohimmye yeeyo.

<sup>78</sup> Vano—vano, vakhala wira... entthunaaka wira mwiire, olapa soovonya sanyu wa Muluku, ni wira, "Pwiya, mukivonihe." Vakhala wira khamunatoko orukunxa murima, nvahererye mirima sanyu wa Kristu. Ni nyuwo mwiira muhinatoko opatisiwa, mmaasini, mwa Nsina na Yesu Kristu, yookhala etanki yoolikana. Munnona?

<sup>79</sup> Ni mwamuthiyan'ola epantte ekina ya ephiro nno; okathi mulipa-oohaamini ole aarukunxiwaawe murima mwaha wa yeela. Okathi owo aammaathiki-awe... Khuroihwiwa owaani okhuma Silvercrest, ni elapaha, akhwaaka. Ni okathi oronwaaka weiwe, ni Apwiya khuvaha yoovoona, khwira, "Owo onoorowa ovonihiwa."

<sup>80</sup> Nto owo khukumana ni miyo iwe, voosiisu aya, Mwenye Andrews, ni khukipwapwela voolipa-vo. Khwira, "Nrromelo woowootha siiso, mwaha wa muthiyan'ole!"

<sup>81</sup> Miyo khwira, “Mwenye Andrews, khuhayo nroromelo wowootha. Muthiyan’ovo muKristu. Ni awerya-ru, onimoorwa opatisiwe.”

<sup>82</sup> Ni owo khwira, “Owo onimookhwa.” Khwira, “Miyo... Vaaweryaneya sayi owo oroihiwa owaani okhuma oSilvercrest?”

<sup>83</sup> Miyo khwira, “Mulopwana, munweha, nyuwo mu... Etthu enwehaanyu, munweha ele meetiku enihimyaawe. Miyo kinweha ele Muluku ohimmyawe.” Munnona?

<sup>84</sup> Vano, evirikanelo ti yeeyo paahi, ethtu enwehaanyu. Munnona? Mwaawehaka ele meetiku onihimyaawe, vekeekhai munookhwa. Masi muhaana oweha ele Muluku ohimmyawe. Nuulumo n’awani muropaanyu okupali?

<sup>85</sup> Ankhi Abrahamu aakupanli muupuwelo wa meetiku wa owo okhalana miyakha emiya, ni aarowa okhalana mwaana ni amwaar’awe, a miloko mithanu na mixexe? Owo aarowa wira exenee nto? Munnona? Vano, meetiku aamwiira, “Mulopwan’ovo mulolo.” Masi Muluku aahimukhaliha naxariya, okhala wira owo aahimwaamini Muluku. Munnona? Vano, nyuwo...

<sup>86</sup> Ni muthiyan’ovo khukhala mukumi. Owo aahinyoonyeriwa opatisiwa, mwa Nsina na Yesu Kristu, okhala wira kinoona wira aari Mmetotista wala muPrespiteriyaano. Owo khupacerya otepa owereiwa. Nto khurwa khimukuxa Grace Weber, aakhala oratteene, wala, nlelo onkhala weiwe, mwan’awe muthiyana, t’onkhala, robe, nto khurwa va, khupatisiwa mwa Nsina na Yesu Kristu, ni ehooma, ni iretta ya miyuwe saakhumme vanikhatani vawe nothene ni sothene, ni ehooma, ya ikharawu emiya ni xexe. Nto khupatisiwa vaava, mwa Nsina na Yesu Kristu. Ni owo onkhala epantte ekina y’ephiro nno. Pooti okilaanthe-ene vaava naanaano va. Koowehaweha wira koone sinto kaamuwerya omoona, minuutu vakhani sivinre. Munnona? Wiiwelela, moone.

<sup>87</sup> Kuhayo paahi orowa iwo... Miyo kinnivirikanyana ni amosa-amosa wa axinn’ihu, omwiixaatherya matata paahi *ola, ole*, ni *mukina*, siiso, ni ehimyaka wira enamuna emosa ya waamini wuulupale enookhumeleliha. Kahi yeeyo. Muhaana okhalana waamini wooloka, woolipa, wa Bibilia, wa Erooho Yoowaarya. Munnona? Kho, khonlekela. Kuhayo woolekela.

<sup>88</sup> Mwaha wa yeeyo kinweryaaka waaxukhuru Apwiya mwaha wa Awo okikhaliherya mpakha va. O—o—ovoniha wiiraneiye ti wooloka, okhala wira ti woolipheriwa oratteene vasulu va SIISO ANIHIMYA T’APWIYA. Munnona? Tivo onookhala.

<sup>89</sup> Vano—vano, ntoko exikola ya Ttiminku yaamukhaani, Miyo kaamulipelela minuutu mmosa paahi, kilavulaka ni nyuwo, mpakha awo okhala mapuro aya, voopuroni, wira niwerye okhala oomaala vano. Nirina minuutu vakhani paahi, ninrowa ovekela, ninoopacerya ovekela.

<sup>90</sup> Vano, kintthuna wira khula mmosa a nyuwo alape soovonya sawe wa Muluku, ni ammanele natiri Muluku wira onoomurumeela Yoowo ni onimwiira sothene sinweryawé. Nto pastore ni miyo ninrowa ovekela, ni owiixaatheryani matata, ni vekeekahi munoovonihawa mwaaminiru.

<sup>91</sup> Vaaweryaneya sayi atthu ale arina attootto, ni oo hiiwa, ni oohilavula, ni oohoona, Ettiminku evinre oxekuwa, owela vaplataforma paahi, omurihela ttootto aya; owela vaplataforma, maitho otthukuwa, moosuwela, siiso? Imiya imiya sene a yaawo! Mpakha, vaakhanlyaka otteettheya, kaahalaaka okumihiwa kikuxiweene nipo nle, keemenle-ene paahi, awo aviraka. Munnona? Othataana waarowa okhuma va mpakha Exikola Sekuntaariya ya oJeffersonville, ohalela, oothataana, ovira moothataana. Ni nkisuwenle vakhala wira ookhala mmosa a yaawo, aavinre, ohivonihiwe. Munnona? Okhala wira awo yaarwiyye ni mulipiheryo wa waamini w'ekkekhai, wooloka wa oKristu ni yaaminiki. Awo...Ehaana wiiraneya.

Vano muuramihe muru anyu, atthu othene, akikhaliherye waavekelela.

<sup>92</sup> Pwiya Yesu, hiyo ninruuha wa Nyuwo, voosiis'ula, muthukuman'ola weemenle va, olipelelaka, wa anamwane aretta, ooxanka, oohaaxiwa. Awo kharina hata nroromelo, anci-ene aya, Pwiya, wa ovoniha wa mameetiku, vanci-enexa mulopwan'ola ommaathale va vanrepani va. Mahala Anyu ahiiso owo onookhuma molumwenkuni mühina mwa mahiku vakhani. Ni vekeekhai, khino siiso akhanleene amosa-amosa yeemenle waltaari nno, onaawereya murima, ni iretta, ni mixankiho saarowa waamalamaliha.

<sup>93</sup> Eri ethu emosa paahi, Tithi, enwerya owoopola, okhanle, orowa ovikana miyonelo mithanu va s'erutthu ila, weiwo mameetiku yeeherenryaaya voororomeleya, vekeekhai, wira yoopole ekumi aya; iretta, kankuru, elapaha, eretta ya murima. Nave ni sooloola sothene, ni ituupu, ni ikaruma, ni—ni—ni mirette soowana-no iropo, nwanani onniithukumanya wira akumihe ekumi aya.

<sup>94</sup> Ni miyo kinnihimyaka, Pwiya, kinnaamini, muupuwelo Anyu, wa yaawo. Ni koomwiwa mulopwan'ovo olavula ilavulelo voosiis'ula, ni khuvaha etaphulelo ele, ethu yaarowa okhumelela olelo. Akina w'awo anoorowa waakhela, Pwiya, vekeekhai. Ti yeeyo. Miyo kinnaamini.

<sup>95</sup> Nto vano, ntoko silempwaly'aya mBibiliani, wira Davidi, mwammiravo makampusi, aaweha ipwittipwithi s'atithi awe, ottaiwene wa mothakoni. Nto nihiku nimosa mwatto khurwa khunvara mmosa wa amwaapittipwitthi a atithi awe, khutthyawa ni yoowo. Nto mmiravo ole makampusi, ni waamini, owo aarina exeeni wira awanane mwatto ola? Kahi erifle ya naanaano wala kapwithi. Masi owo aarina pharancikula

mwaamukhaani, khimurowela mwatto ole. Owo khumwiiva mwatto ole, khuttikiha epwittipwithi ele. Ekhaya khurwa khuvara emosa; owo khutthimakela ekhaya ele aaweryawe onyakattelaka vathi. Masi owo khuupuwenle wunnuwa wa ekhaya, wala ikuru sa mwatto, wala oveya wawe, wala ohiwerya wawe ni pharancikula.

<sup>96</sup> Masi okathi owo eemenly'awe oholo wa mwene Sawuli, owo iirale, "Murumeyi Anyu aakukhula ipwittipwithi s'atithi awe, nto mwatto khurwa khukuxa emosa, khutthyawa. Vano miyo khumurowela khuhokoloxa epwittipwithi." Owo khwira, "Muluku ene yoowo okivulunxe mmatatani, ahiiso munipitani na ekhaya ele, wala munanttereni mwa mwatto ole, onniwerya nave-tho omukuxa muFilisti ula oohilyihwa masoma okivaha mmatatani mwaka."

<sup>97</sup> Ntoko sinsuwelaahu ehantisi ennihimya, wira owo aahimwiiva; aahimwiiva mulopwana mmosa aari muulupale, imaara sinci-ene onvikana owo, ni nakhotto. Moota yaamatikininhe aya Sawuli, mwene ole muulupale, mulopwana muulupale ni oowerya, moota mwammirav'ole aakhanlyawe omwaaminiki vaalupale pharancikula. Nnari, kahi omwaamini pharancikula, masi omwaamini Muluku.

<sup>98</sup> Vano, Pwiya, yeemenle-ene waltaari nno, yimmaathale vanrepani va, siri ipwittipwithi sa Muluku, amwaapwittipwithi axikhaani, ntoko saarowaahu ohimya, wa Yoowo. Awo aroovariwa ni mwatto mmosa oniitthaniwa kankuru, ekhaya eniitthaniwa elapaha, iretta sikina saavanre, ni saaxinttale, sinaamalamaliha. Pwiya, miyo—miyo kinimwaarowela ni pharancikula mwaamukhaani oniitthaniwa ovekela wa waamini. Kahi vanci-ene, masi koosuwela ethu oniirakaawe. Ni koosuwela wira Muluku nlelo mmosaru. Miyo kinimwaarowela, voosiis'ula, wira kaahokoloxerye, Pwiya, mminyepuni sikithi ni sa ekumi yooreera, vakhiviru va maasi oomaaleleya a murettele, ni ottaiwene wa wuukhuleya waya, wira ewaaminini Nyuwo.

<sup>99</sup> Miyo kinimwaarowela, ni ikaruma Nyuwo nvahenryanyu wira kirowe. "Mavekelo o wamini anoowoopola aretta, nto Muluku onimwavenyiha. Vakhala wira arimwiira etampi, anooleveleliwa."

<sup>100</sup> Nto, Tithi, hiyo ninrowa vano okumana ni nwanani, okumana ni mwatto, wira nakumane ni xe-xetwani mwa khula enamuna owo oryaawe, oniitthaniwa kankuru, elapaha, iretta ya Hodgkin, iretta ya murima, khula iretta ekina. Hiyo ninrowa okumana ni yoowo, wira nimuruuhhe mwaapittipwithi ola otthikela Mpaani mwa Muluku. Mwa Nsina na Yesu Kristu hiyo ninrowa, omurumeela pharancikula ola Nyuwo munivahale anyu. Mukhale ni hiyo, Tithi, okathi oniwaattamelahuni Nyuwo ni nttitimihi vano, mwa Nsina na Yesu.

<sup>101</sup> Kintthuna wira mukhale ni muru wowuurama. Nto hiyo ninoorwa wira naattikitthele makhura, ni owiixaatherya matata aretta, ni mavekelo o waamini anoowoopola aretta. Khula muKristu mu, muhelele waamini wanyu elinya ela ya mavekelo.

[Eliinya ya mavekelo enikuxa minuutu miraru ni nuusu, moolomo manci-ene a Munna Branham khaniweya—Mol.]

Mwa Nsina na Yesu Kristu!

Mwa Nsina na Yesu Kristu!

Nsina na Yesu!

Nsina na Yesu Kristu!

Nsina na Yesu!

Tithi, miyo kinnimpwapwela xetwani! . . . ? . . .

Mwa Nsina na Yesu Kristu!

Mwa Nsina na Yesu Kristu! . . . ? . . .

Mwa Nsina na Yesu Kristu!

Murwe mwaamini . . . ? . . . nto enimwiiriwa! . . . ? . . .

Pwiya, Nyuwo . . . ? . . .

Muluku . . . ? . . .

<sup>102</sup> Pwiya, Nyuwo mwa . . . Nyuwo moolepa okathi. Nyuwo mwa Mmusi, Kristu! . . . ? . . . Mwa Nsina na Yesu Kristu!

<sup>103</sup> “Mavekelo o waamini anoomoopola muretta.” Kintthuna wira Nyuwo mmwiirele ola. Mmukhalihe-tho mukumi muthiyan’ola! . . . ? . . .

Nsina na Yesu Kristu, mmuhokoloxe!

Mwa Nsina na Yesu Kristu, mmuhokoloxe! . . . ? . . .

Mwa Nsina na Yesu Kristu, kimuhokoloxaka murokor’aka.

Mwa Nsina na Yesu Kristu, kimuhokoloxaka munn’aka! . . . ? . . .

Mwa Nsina na Yesu Kristu! . . . ? . . .

Mwa Nsina na Yesu Kristu! . . . ? . . .

Mwa Nsina na Yesu Kristu! . . . ? . . .

Nyuwo khamunatoko wira. Apwiya yooreeriheni!

Miyo kinoomurowela, voosiis’ula! . . . ? . . .

<sup>104</sup> Mwa Nsina na Yesu Kristu, miyo kinnoohokoloxani, ni mavekelo o waamini, wookumihani mw’epotthani! . . . ? . . . Hiyo ninaacererya waamini wahu wa ala! . . . ? . . .

Waamini paahi;

Ni muru ahu wowuurama vano. Vano:

Waamini paahi, waamini paahi,  
. . . simniweryaney, waamini paahi.

O Pwiya, kinnaamini, O Pwiya, kinnaamini,

Sothene sinniwyeryaneya . . .  
Nrowe nivenxe matata vano.

. . . Pwiya, kinnaamini;  
O Pwiya, kinnaamini; Pwiya, kinnaamini,  
Sothene sinniwyeryaneya, Pwiya, kinnaamini.

<sup>105</sup> Tith'ihu a Wirimu, ale awenrye ovenya, avenxale matata aya, wira aakupali ela. Munn'ola aammaathale vanrepani, oovenya, wira ooniherye wira ookupali ovonihiwa wawe. Hiyo ninnaamini, Pwiya, awo anttikela ni murettele mminyepuni sikithi ni sa muuttutthi, mmaasini oomaaleleya, wira akhale-tho saana, mwa Nsina na Yesu. Hiyo ninnooxukhuruni mwaha wa yeela. Amen.

<sup>106</sup> Vaareera, Munna Neville, kinookilaathi va kiwiwени mulaleyaka vano.

<sup>107</sup> [Wopaceryani mmuutthakani Munna Branham onnihimya "yooheliwa-mo ekhaani" Munna Thomas R. Nickel, Namalepa a Nsu na Alopwana a Ehapari yooreera Yoomalela, yeheliwe vanikukhuni noopacerya na artiiku, nenlo nnihimya ela: "VANAASIWA ELATARATO OHOOLO WA EKAAPA: Mahiku a Bibilia, yaahikhala atthu a Muluku yaari maprofeta ni anamoona s'oholo. Masi mwa Soolempwa sothene Soorerihiwa, khaavo hata mmosa a awo aarina muteko muulupale ovikana ole wa William Branham, profeta ni namoona s'oholo a Muluku, yoowo elatarato awe emphwanyaneya ekaapa y'oholo ya elepeliwo ela Nsu ya Alopwana a Ehapari yooreera Yoomalela. Branham onnivareliwa muteko ni Muluku, mwa Nsina na Yesu, wira aahihimuxe alipa-ookhwa!"—Mol.] 

61-0305 Wiithela Wa Ekurtiina Ya Okathi  
Branham Tabernacle  
Jeffersonville, Indiana wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa ethu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumiheweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthunikeriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhanle, xontte mulavule ni:

**VOICE OF GOD RECORDINGS**

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)